

ЎЗБЕКИСТОН РЕСПУБЛИКАСИ
ВАЗИРЛАР МАҲКАМАСИНИНГ
Қ А Р О Р И



ПОСТАНОВЛЕНИЕ
КАБИНЕТА МИНИСТРОВ
РЕСПУБЛИКИ УЗБЕКИСТАН

5 декабрь 2017 й.г.

№ 968

Тошкент ш. – г. Ташкент

**Ўзбекистон Республикаси Фавқулодда вазиятлар вазирлигининг
моддий-техника базасини мустаҳкамлаш ҳамда ходимларини моддий
рағбатлантириш чора-тадбирлари тўғрисида**

Ўзбекистон Республикаси Президентининг “Фавқулодда вазиятларнинг олдини олиш ва бартараф этиш тизими самарадорлигини тубдан ошириш чора-тадбирлари тўғрисида” 2017 йил 1 июндаги ПФ-5066-сон Фармони талабларини бажариш ҳамда Ўзбекистон Республикаси Фавқулодда вазиятлар вазирлигининг моддий-техника базасини мустаҳкамлаш, шунингдек, ходимларини моддий рағбатлантириш максадида Вазирлар Маҳкамаси қарор қилади:

1. Ўзбекистон Республикаси Фавқулодда вазиятлар вазирлиги, Молия вазирлиги ва Иқтисодиёт вазирлигининг Ўзбекистон Республикаси Фавқулодда вазиятлар вазирлигининг моддий-техника базасини мустаҳкамлаш, шунингдек, ходимларини моддий рағбатлантириш бўйича бюджетдан ташқари махсус жамғармасини (кейинги ўринларда Бюджетдан ташқари махсус жамғарма деб аталади) ташкил этиш тўғрисидаги таклифига розилик берилсин.

2. Қуйидагилар Бюджетдан ташқари махсус жамғарма даромадларини шакллантириш манбалари белгилансин:

кичик ҳажмли кемаларни рўйхатдан (қайта рўйхатдан) ҳамда техник кўриқдан ўтказишдан тушадиган маблағларнинг 60 фоизи миқдоридаги ажратмалар;

аҳолини ва ҳудудларни табиий ҳамда техноген хусусиятли фавқулодда вазиятлардан муҳофаза қилиш, шунингдек, фуқаро муҳофазаси тўғрисидаги қонун ҳужжатлари талабларини бажармаслик, кичик ҳажмли кемаларни рўйхатдан ўтказиш қоидаларини, шунингдек, бундай кемалардан ва улар турадиган базалардан (иншоотлардан) фойдаланиш қоидаларини бузганлик, кема ҳайдовчиларининг кичик ҳажмли кемаларни маст ҳолда бошқаргани учун белгиланган тартибда солинадиган жарималар суммасининг 60 фоизи миқдоридаги ажратмалар;

Ўзбекистон Республикаси Фавқулодда вазиятлар вазирлигининг ҳудудий бошқармалари, таркибий тузилмалари ва идоравий мансуб ташкилотларини ривожлантириш бўйича бюджетдан ташқари жамғармалар фойдасининг 15 фоизи миқдоридаги ажратмалар;

Ўзбекистон Республикаси аҳолисига хабар бериш ва маълумот (ахборот) етказишнинг автоматлаштирилган тизимидан реклама-маркетинг маълумотларни трансляция қилиш учун фойдаланишдан тушадиган даромадлар;

юрidik ва жисмоний шахслар, шу жумладан Ўзбекистон Республикаси норезидентларининг хайрия маблағлари;

вақтинча бўш турган маблағларни тижорат банкларининг депозитларига жойлаштиришдан тушадиган даромадлар;

конун ҳужжатларида тақиқланмаган бошқа даромадлар.

3. Ўзбекистон Республикаси Фавқулодда вазиятлар вазирлигининг моддий-техника базасини мустаҳкамлаш, шунингдек, ходимларини моддий рағбатлантириш бўйича Бюжетдан ташқари махсус жамғармаси маблағларини шаклантириш ва улардан фойдаланиш тартиби тўғрисидаги Низом 1-иловага мувофиқ тасдиқлансин.

4. Ўзбекистон Республикаси Фавқулодда вазиятлар вазирлиги Ўзбекистон Республикаси Молия вазирлиги билан келишган ҳолда Ўзбекистон Республикаси Фавқулодда вазиятлар вазирлигининг ҳудудий бошқармалари, таркибий тузилмалари ва идоравий мансуб ташкилотларини ривожлантириш бўйича бюджетдан ташқари жамғармалар маблағларини шаклантириш ва улардан фойдаланиш тартиби тўғрисидаги Низомни бир ой муддатда тасдиқлансин.

5. Вазирлар Маҳкамасининг 2010 йил 2 апрелдаги 62-сон қарори (Ўзбекистон Республикаси ҚТ, 2010 й., 4-сон, 14-модда) билан тасдиқланган Вазирликлар, давлат кўмиталари ва идораларнинг бюджетдан ташқари жамғармаларига йўналтирилаётган давлат божлари, йиғимлар ва солиқ бўлмаган тўловлардан, маъмурий ва молиявий жазолардан ажратмалар миқдорларига 2-иловага мувофиқ қўшимча киритилсин.

6. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари – “Ўзбекистон темир йўллари” АЖ бошқаруви раиси А.Ж. Раматов ва Ўзбекистон Республикаси Фавқулодда вазиятлар вазири Р.М. Джураев зиммасига юклансин.

**Ўзбекистон Республикасининг
Бош вазири**



А. Арипов

Вазирлар Маҳкамасининг
2017 йил 5 декабрдаги
968 - сон қарорига
1-илова

**Ўзбекистон Республикаси Фавқулодда вазиятлар вазирлигининг
моддий-техника базасини мустаҳкамлаш, шунингдек, ходимларини моддий
рағбатлантириш бўйича Бюджетдан ташқари махсус жамғармаси тўғрисида
Низом**

1-боб. Умумий қоидалар

1. Ушбу Низом Ўзбекистон Республикаси Фавқулодда вазиятлар вазирлигининг моддий-техник базасини мустаҳкамлаш, шунингдек, ходимларини моддий рағбатлантириш бўйича Бюджетдан ташқари махсус жамғармаси (кейинги ўринларда Жамғарма деб аталади) маблағларини шакллантириш ва улардан фойдаланиш тартибини белгилайди.

2. Жамғарма ўз фаолиятини Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, бошқа қонун ҳужжатларига, шунингдек, мазкур Низомга мувофиқ амалга оширади.

3. Жамғарма Ўзбекистон Республикаси Фавқулодда вазиятлар вазирлигида (кейинги ўринларда Вазирлик деб аталади) юридик шахсни ташкил этмаган ҳолда тузилади.

4. Жамғарма маблағлари Вазирликнинг бюджетдан ташқари махсус ҳисобрақамида жамланади.

**2-боб. Жамғарма маблағларини шакллантириш
ва улардан фойдаланиш тартиби**

5. Жамғарма маблағлари:

кичик ҳажмли кемаларни рўйхатдан (қайта рўйхатдан) ҳамда техник кўриқдан ўтказишдан тушадиган маблағларнинг 60 фоизи миқдоридаги ажратмалар;

аҳолини ва ҳудудларни табиий ҳамда техноген хусусиятли фавқулодда вазиятлардан муҳофаза қилиш, шунингдек фуқаро муҳофазаси тўғрисидаги қонун ҳужжатлари талабларини бажармаслик, кичик ҳажмли кемаларни рўйхатдан ўтказиш қоидаларини, шунингдек, бундай кемалардан ва улар турадиган базалардан (иншоотлардан) фойдаланиш қоидаларини бузганлик, кема ҳайдовчиларининг кичик ҳажмли кемаларни маст ҳолда бошқаргани учун белгиланган тартибда солинадиган жарималар суммасининг 60 фоизи миқдордаги ажратмалар;

Вазирликнинг ҳудудий бошқармалари, таркибий тузилмалари ва идоравий мансуб ташкилотларини ривожлантириш бўйича бюджетдан ташқари жамғармалари фойдасининг 15 фоизи миқдоридаги ажратмалар;

Ўзбекистон Республикаси аҳолисига хабар бериш ва маълумот (ахборот) етказишнинг автоматлаштирилган тизимидан реклама-маркетинг маълумотларни трансляция қилиш учун фойдаланишдан тушадиган даромадлар;

юридик ва жисмоний шахслар, шу жумладан Ўзбекистон Республикаси президенти раисининг хайрия маблағлари;

вақтинча бўш турган маблағларни тижорат банкларининг депозитларига жойлаштиришдан тушадиган даромадлар;

қонун ҳужжатларида тақиқланмаган бошқа даромадлар ҳисобига шакллантирилади.

6. Жамғарма маблағлари:

Вазирликнинг моддий-техника базасини мустаҳкамлаш тадбирларини, бунда Жамғарма маблағларининг 75 фоизидан кам бўлмаган миқдори ушбу мақсадларга сарфланади;

вакиллик тадбирларини (хорижий делегацияларни кутиб олиш, транспорт хизмати, таржимонларни жалб қилиш, совға ва сувенирлар сотиб олиш, овқатлантириш);

спорт мусобақалари ва маданий тадбирлар ўтказишни;

хорижий мутахассисларни жалб қилиш тадбирларини;

Вазирлик ходимларини тайёрлаш, қайта тайёрлаш ва малакасини ошириш тадбирларини;

Вазирликнинг фавқулодда вазиятларнинг олдини олиш соҳасида ўз хизмат фаолиятида юқори натижаларга эришган ходимларини моддий рағбатлантириш ва ижтимоий муҳофаза қилиш чораларини, шу жумладан:

санаторий-курорт ва тиббий хизмат кўрсатишни;

юқори касб маҳорати, мураббийлик учун ҳамда алоҳида ўрнатилган кўрсатилган Вазирлик ходимларини асосий тариф ставкаларига ҳар ойлик устамалар белгилаган ҳолда моддий рағбатлантиришни;

бир йўла мукофотлаш ва моддий ёрдам кўрсатишни (алоҳида ҳолларда) молиялаштиришга йўналтирилади.

3-боб. Жамғармани бошқариш

7. Жамғарма таркиби ва фаолият тартиби Вазирликнинг хайъати томонидан белгиланадиган ва тасдиқланадиган Жамғармани бошқариш кенгаши томонидан бошқарилади.

8. Қуйидагилар Жамғармани бошқариш кенгашининг асосий вазифалари ҳисобланади:

Жамғарма маблағларидан мақсадли ва самарали фойдаланилишини назорат қилиш;

ҳар йили 25 декабргача Жамғарманинг келгуси йил учун даромадлари ва харажатлари сметаларини тасдиқлаш;

Жамғарманинг чорак якуни бўйича даромадлари ва харажатлари тўғрисидаги ҳисоботини кўриб чиқиш ва тасдиқлаш;

Жамғармага хорижий кредит ва грантлар жалб этилишига кўмаклашиш;

Жамғарма маблағларини шакллантириш ва улардан фойдаланиш билан боғлиқ бошқа ваколатларни амалга ошириш.

9. Жамғармани бошқариш кенгашининг мажлиси унда аъзоларининг камида учдан икки қисми иштирок этган тақдирда ваколатли ҳисобланади.

Жамғарма маблағларидан фойдаланиш тўғрисидаги қарор Жамғармани бошқариш кенгаши аъзоларининг оддий кўпчилиги овози билан қабул қилинади ва Жамғармани бошқариш кенгаши раиси томонидан тасдиқланади.

10. Вазирликнинг молия-иқтисодиёт бошқармаси Жамғарманинг Ишчи органи ҳисобланади.

11. Ишчи орган қуйидаги функцияларни амалга оширади:

Жамғарманинг келгуси йил учун даромадлари ва харажатлари прогноз кўрсаткичларини ишлаб чиқади;

даромадлар ва харажатлар сметаларини тайёрлайди, шунингдек, уларга қонун ҳужжатларида белгиланган тартибда ўзгартиришлар киритади;

Жамғарма тушумларини кўпайтириш ва унинг маблағларидан самарали фойдаланиш бўйича таклифлар тайёрлайди;

сўровномаларни умумлаштиради ва Жамғармани бошқариш кенгашига кўриб чиқиш учун материаллар тайёрлайди;

Жамғарманинг тушумлар манбалари ҳамда асосий харажатлар йўналишлари бўйича даромадлари ҳисобини юритади;

Жамғарма маблағларидан мақсадли фойдаланиш юзасидан техник ва молиявий назоратни олиб боради;

ҳар чорақда камида бир марта Жамғарма маблағларидан фойдаланилиши тўғрисида ҳисобот тайёрлайди ва Жамғармани бошқариш кенгашига тақдим этади.

4-боб. Ҳисоб, ҳисобот ва назорат

12. Жамғарма маблағларидан фойдаланиш бўйича ҳисоб ва ҳисоботлар Вазирликнинг бюджетдан ташқари бошқа маблағларидан алоҳида юритилади.

13. Жамғарманинг тушумлари ва харажатлари сметаси бюджет ташкилотлари учун бюджетдан ташқари маблағлари бўйича қонунчиликда белгиланган тартибда тузилади (чорақлар, тушумлар манбаалари ва улардан фойдаланиш йўналишлари кесимида) ва Жамғармани бошқариш кенгаши томонидан тасдиқланади.

14. Жамғармани бошқариш кенгаши раиси Жамғарманинг даромадалари ва харажатлари сметаларига зарурат бўлганда ўзгартиришлар киритиш ҳуқуқига эга.

15. Жамғарманинг даромадлари ва харажатлари сметаларининг бажарилиши бўйича йиллик ҳисобот Вазирлик ҳайъати мажлисида кўриб чиқилади ва ҳар йили 15 мартгача Жамғармани бошқариш кенгаши томонидан тасдиқланади.

16. Жамғарма маблағларидан мақсадли фойдаланилиши Ўзбекистон Республикаси Молия вазирлигининг Давлат молия назорати бош бошқармаси томонидан назорат қилинади.

5-боб. Яқунловчи қонда

17. Ушбу Низом талаблари бузилишида айбдор бўлган шахслар қонун ҳужжатларида белгиланган тартибда жавоб беради.

Вазирлар Маҳкамасининг
2017 йил 5 декабрдаги
968 - сон қарорига
2-илова

Вазирликлар, давлат қўмиталари ва идораларнинг бюджетдан ташқари жамғармаларига йўналтирилаётган давлат божлари, йиғимлар ва солиқ бўлмаган тўловлардан, маъмурий ва молиявий жазолардан ажратмалар миқдорларига киритилаётган қўшимча

Қуйидаги таҳрирдаги 34-позиция қўшилсин:

«	34.	Ўзбекистон Республикаси Фавқулодда вазиятлар вазирлиги	Кичик ҳажмли кемаларни рўйхатдан (қайта рўйхатдан) ҳамда техник кўрикдан ўтказишдан тушган маблағлар	60
			Аҳолини ва ҳудудларни табиий ҳамда техноген хусусиятли фавқулодда вазиятлардан муҳофаза қилиш, шунингдек фуқаро муҳофазаси тўғрисидаги қонун ҳужжатлари талабларини бажармаслик, кичик ҳажмли кемаларни рўйхатдан ўтказиш қоидаларини, шунингдек, бундай кемалардан ва улар турадиган базалардан (иншоотлардан) фойдаланиш қоидаларини бузганлик, кема бошқарувчиларининг кичик ҳажмли кемаларни маст ҳолда бошқаргани учун белгиланган тартибда солинадиган жарималар суммаси	60

».